

Saya tidak keseorangan - Najib
Astro Awani
April 23, 2015
Oleh Linawati Adnan

KUALA LUMPUR: Perdana Menteri, Datuk Seri Najib Tun Razak hari ini memberikan reaksi yang cukup berdiplomasi terhadap kenyataan bekas perdana menteri Tun Dr Mahathir Mohamad yang mengatakan beliau keseorangan dalam menyatakan kebenaran terhadap masalah yang dihadapi pentadbiran Najib.

Dalam ucaptamanya di Invest Malaysia 2015 sebentar tadi di Hotel Mandarin Oriental, Najib berkata:

"Sejak kebelakangan ini, timbul kenyataan yang mengatakan adakalanya anda akan keseorangan sekiranya bercakap mengenai kebenaran. Tetapi, saya berani untuk mengatakan kepada anda semua yang saya tidak berseorangan berdiri di hadapan anda semua hari ini!"

"Dan ketika banyak organisasi, individu dan badan-badan luar yang dihormati di peringkat antarabangsa menyatakan keyakinan dan kepercayaan terhadap kejayaan Malaysia dan meletakkan negara kita di tempat yang begitu tinggi, saya langsung tidak rasa keseorangan. Malah saya rasa saya dikelilingi oleh rakan-rakan yang baik!," tambah Najib.

"Saya juga yakin, dengan kestabilan dan pembangunan Malaysia di bawah pentadbiran kerajaan, saya boleh mengharapkan sokongan anda semua dalam tahun-tahun yang akan datang," katanya.

Dr. Mahathir baru-baru ini meluahkan kekecewaannya dalam laman blog miliknya (www.chedet.cc), dengan mengatakan beliau bersendirian dalam melontarkan kritikan ke atas pentadbiran kerajaan yang diketuai Najib.

Beliau berkata demikian sebagai mengulas isu 1Malaysia Development Bhd (1MDB) yang dilanda kemelut hutang dan sehingga kini masih tiada jawapan, selain turut menyentuh isu pembunuhan model dan penterjemah dari Mongolia, Altantuya Shaariibuu pada tahun 2006.

Copyright © Astro Awani Network Sdn. Bhd. 2015 (535275-D). All Rights Reserved.

Source: <http://www.astroawani.com/berita-politik/saya-tidak-keseorangan-najib-58493>